

Akamwambia, Amin, amin, nawaambia, Mtaziona mbingu zimefunguka na malaika wa Mungu wakikwea na kushuka juu ya Mwana wa Adamu—Yohana 1:51.

Mungu ametupatia kiwango kamilifu cha tabia, ambacho tunalazimika kukitafakari daima. Kupitia kwa uwezo ambao Yesu anatoa, tunaweza kuitunza sheria ya Mungu. Inatupasa kuwa watoto watiifu, pasipo kujali ugumu tunaoweza kukabili na. Haitupasi kutarajia kuingia mbinguni bila kuwa na mapambano na majaribu, lakini tunao uhakika kwamba ikiwa hatutatafuta kufanya yatupendezayo, bali kufanya mapenzi ya Mungu, hatutaachwa kupigana vita peke yetu.

Kuna kazi kubwa ya kufanywa ulimwenguni, na kila mmoja wetu analazimika kuiacha nuru yake iangaze katika njia ya wengine. Inatupasa kukusanya miale mitakatifu ya nuru toka kwa Yesu. Inatupasa kuchunguza Maandiko, na kuzama kwa kina katika mgodi wa ukweli; kwa maana vito vya thamani daima havipatikani vivi hivi; inatulazimu kivitafuta kama hazina iliyositirika. Tunaweza kupata furaha kamili mbinguni, kwa maana Yesu ameenda kutuandalia mahali; na sasa ndiyo wakati wetu wa kufanya maandalizi kwa ajili ya kile Anachotuandalia. Ili tuweze kufanya hivi, inatulazimu kumtafakari Kristo kila siku maishani mwetu; kwa wale wanaoyatafakari makao ya raha lazima mioyo yao isiwe na husuda, wivu, chuki, uovu, na ubinafsi. Yesu anasubiri kufanya mambo makubwa kwa ajili yetu, kutujaza kwa ukamilifu wote wa Mungu. Inatupasa kuziamini ahadi Zake, kwa maana “Huishika kweli daima,” “na ndani Yake hakuna udhalimu” (Zaburi 146:6; 92:15) (The Signs of the Times, Desemba 8, 1890).

Kuna muunganiko kati ya nchi na mbingu kupitia Kristo, ngazi ya isiyoielezeka ambayo Yakobo aliona katika ndoto pale Betheli. Tulipokuwa tumetengwa mbali na Mungu, Kristo alikuja ili kutupatanisha na Baba. Katika upendo wenye huruma Aliuweka mkono Wake wa kibinadamu juu ya jamii iliyoanguka, na kwa mkono Wake Uungu alikishikilia kiti cha enzi cha Mungu, hivyo kumuunganisha mwanadamu na Mungu wa milele; kwa njia ya mpango wa wokovu tumeunganishwa na mawakala wa mbinguni. Kupitia kwa wema wa Mkombozi aliyesulubiwa na kufufuka, tunaweza kutazama juu na kuuona utukufu wa Mungu uking’aa toka mbinguni hadi duniani. Inatupasa kumshukuru Mungu kwa ajili ya mpango wa wokovu. Tumebarikiwa kwa Baraka nyingi, na kwa mwitikio inatupasa kumpatia Mungu mioyo yetu.

Inasikitisha sana kwamba kwa kutojali kwetu masuala yetu ya milele tumetanga mbali na Yesu.... Hatuuoni utukufu wa Mungu uking’aa juu ya kila mzunguko wa ngazi; hatupandi juu kupitia kwa Kristo, tukisonga mbele katika maisha matakatifu. Ikiwa tungefanya hivi, tungeakisi sura ya Yesu, kuwa na usafi wa tabia, na kuwa kama nuru ulimwenguni. Inatupasa kumtazama Yeye daima, mpaka tuweze kuvutiwa na neema ya tabia Yake; kisha hatutakosa kumzungumzia Yeye na upendo Wake. Basi tunapaswa kuwa na baraka nyingi ambazo ulimwengu hauwezi kutoa au kuzichukua, na tunapaswa kupoteza shauku yetu ya dhambi,

(The Signs of the Times, Desemba 15, 1890).